

HITZ BITAN

EZBEHARRA. Atestatua igorri diote epaitegiari

Hegazkin istripua zerk eragin zuen ikertzen jarraitzen dute Abiazio Zibileko teknikariek

Gorane Agirre | BILBO

Zaldibarko Santamariñazar mendian astelehen goizean gertatutako hegazkin istripua zerk eragin zuen ikertzen segitzen dute Espainiako Sustapen Ministerioi Hegazkintza Zibileko teknikariek. Ezbeharra eragin zezaketen balizko hiru arrazoi darabiltzate esku artean adituok: astelehen goizean Durangaldean zegoen laino itxia, matxura tekniko edo giza akatsa.

Ertzaintzako mendiko salbamendu taldeak lagun, teknikariorik hegazkinak zeraman zama zein hiru lagun gorpuen hondakinak bilatzen eta biltzen jarraitu zuten atzo Santamariñazarren, lainoak eta euri etengabeak asko lagundu ez bazuten ere. Gaur berriz ekingo diote lanari, Ertzaintzako iturriek atzo jakinarazi zuten.

Madrilgo Hegazkintza Zibile-

ko adituez gain, hegazkina erakiki zuen Embraer konpainiako teknikariak eta Ibertrans konpainiako zuzendariak ere ari dira parte hartzen ikerketa lanetan.

Kutxa beltzaren azterketaren emaitzak epaitegian dira jada

Bestalde, Ertzaintzak istripuaren atestatua igorri zion atzo kasuaz arduratzen den Durangoko Lehen Auzialdiko eta Argibideko Bigarren Epaitegiari. Espediente horretan, besteak beste, astelehen arratsaldean aurkitutako kutxa beltzaren azterketak eta istripuaren lekukoaren adierazpenak jasotzen dira.

Orain, Durangoko Epaitegiako magistratuak kasuaren sumarioa sekretutzat joko duen edo beronen instrukzioari ekingo dion erabaki beharko du.

Bestalde, hegazkin istripuan hil ziren hiru lagun



JON HERNÁEZ / ARGAZKI PRESS

Salbamendu taldeek atzo ere lanean jarraitu zuten.

—bi pilotuak eta mekanikoa— gorpuek Bilboko Albia Justizialdean kokatuta dagoen Auzitegi Anatomia Institutuan segitzen dute. Auzitegi medikuak autopsiak egiten eta hondakinak aztertzen ari dira.

Istripuan hildako hiru lagunak honakoak dira: Miguel Angel Alemany 58 urteko pilotu mardildarra; Bartzelonako

Igualadako Francesc Alemany 25 urteko kopilotua eta Valentiako Agustin Jordan Sese mekanikoa. Auzitegi medikuek beren jarduera bukatu ostean, hiru lagun gorpuek euren jaioterrietara eramango dituzte.

Zama lanak egiten zituen Embraer 120 hegazkina Zaldibarko Santamariñazar mendian

erori zen astelehen goizeko 07:30 aldera, hain zuzen ere, Loiuko aireportuan lurreratu aurretik hurbiltzeko maniobrak hasteko baimena eskatu eta minutu gutxi batzuk geroago. Oraindik istripua zergatik gertatu zen ez badakigu ere, hegazkinak bat-bateko 1.000 metroko erorikoa jasan zuen, eta hiru heriotza izan ziren.

ERASOA

Hiru auto erre dituzte Angelun

Herenegun gauean hiru auto erre zituzten, Miarritzeko etorbidea deritzon karrikan, Angelun. Erre-tzaileek ezantza eta kartoiak ezarri zituzten autoen azpian. Polizia iturrien arabera, ekintza hauen egileak gaiztagin arruntak lirateke, eta ekintzen iturburuan ez legoke arrazoi politikorik.

SEXU INDARKERIA

Gizon bat atxilotu dute Gasteizen neska-laguna jipoitu eta labanaz mehatxatzea leporatuta

Ertzaintzak 48 urteko J.V.C. atxilotu zuen herenegun, Gasteizen, neska-laguna jipoitzeaz eta labana batekin mehatxu egiteaz akusatuta. Herrizaingo Sailaren arabera, emakumea laguntzera joandako ertzainak ere mehatxatu zituen gizonak.

Ustez bikotekide ohia bihurkin batekin mehatxatu zuen gizona atxilotu dute Bilbon

Bilboko Udaltzaingoak 38 urteko E.J.M. atxilotu zuen herenegun, bikotekideari bihurkin batekin mehatxu egin eta urrezko kate bat lapurtzea leporatuta. Gizonak emakumeari hurbiltzeko debekua zuen lehenik.



JUAN HERRERO / EFE

HEZKUNTZA

Arkitekturako ikasleek beste protesta bat egin dute Donostiako Errektoreordetzan

Donostiako Arkitektura Fakultateko ikasleek greba mugagabean jarraitzen dute, ikasgai askotan irakasleak falta dituztela salatzen. Horren haritik, atzo ekintza berri bat egin zuten, Gipuzkoako campuseko Errektoreordetzaren aurrean. Beraien aldarrikapenaren seinale bihurtu den kaskoa buruan zutela, giza katea egin zuten ikasleek; eta, ondoren, eraikuntza lanen seinaleak «landatu» zituzten lurrean.

OSASUNA

Baionako Cassin Lizeoan 50 laguni jarri diete meningitisaren kontrako txertoa

Atzo goizean 50 laguni jarri zieten meningitisaren aurkako txertoa Baionan. Izan ere, pertsona horiek, joan den ostiralean meningitisaren ondorioz zendu 16 urteko nerabearekin harreman zuzenean egon ziren, Cassin lizeoan. DASSeko osasun zerbitzuek adierazi zuten ez dagola izurritarik eta zorigaitzez, urtero izaten diren meningitis kasuen artean kokatzen dela ostiralekoa. 12 lagunek pairatu zuten meningitisa 2000. urtean, 13k iaz.

HEZKUNTZA

Euskal Herri osorako Unibertsitatea sortzeko lege proposamena aurkeztu dute Eusko Legebiltzarrean

Bai Euskal Unibertsitateari egiturak bultzatuta lege izateko asmoa duen proposamena aurkeztu zuten atzo EAEko Legebiltzarrean, herri ekimeneko lau ordezkari —Arantza Urkaregi, Iñigo Santxo, Andres Martinez eta Ibai Redondo—. Euskal Herri osorako unibertsitate bakarra sortzea dute helburu herri ekimeneko kideek, eta hainbat erakundetan aurkeztuko dute ekimen legegile bera. Orain, Eusko Legebiltzarreko Mahaiak 30 eguneko epea du testua tramitera onartzeko, eta, horren ondoren, herri ekimeneko kideek 30.000 sinadura bildu beharko dituzte.

EUSKARA

Euskara Kultur Elkargoak 23 helegite aurkeztu ditu Nafarroan, hizkuntza eskubideen urraketak salatzen

Euskara Kultur Elkargoak atzo aurkeztu zuen 2001eko ekimen juridikoaren txostena. Bertan jasotzen denez, iaz 23 kexu eta helegite aurkeztu zituzten Nafarroako herritarrek pairatu dituzten hizkuntza eskubideen urraketak salatzen; eta horietako bakar batek ere ez du erantzunik jaso. Besteak beste, bide seinale elebidunengatik eta Iruñeko Udaleko euskararen ordenantzagatik aurkeztu dituzte kexu eta helegiteak.

EUSKO JAURLARITZA

Meteorologia eta Klimatologia Zuzendaritza sortuko du Garraio eta Herri Lanetako Sailak

Eusko Jaurlaritzako Garraio eta Herri Lanetako Sailak zuzendaritza berri bat izango du bere kargu, gaurtik aurrera: Meteorologia eta Klimatologia Zuzendaritza. Meteorologia Zuzendaritzaren eginkizun nagusia Gipuzkoa, Araba eta Bizkaiko ekimen meteorologikoen zuzendaritza, garapena eta koordinazioa izango da. Horrekin batera, meteorologia eta klimatologia ikerketen garapena, meteorologia azpiegituren plangintza, informazioa zabaltzea eta formazioa izango dira bere ardura. Era berean, uren gaineko ardura ere aldatu du Jaurlaritzak. Izan ere, gai hori Herri Lanetako Sailarena zen, baina aurrerantzean Lurralde Antolamendu eta Ingurumen Sailarena izango da.